



**Nastavak pomoći Evropske unije u
oporavku od poplava:
EKONOMSKO OSNAŽIVANJE
PORODICA**



35-godišnja Dragica iz Bijeljine ponosno pokazuje odjeću koju je sašila. Dragica je **polaznica obuke o poduzetništvu** Programa za oporavak od poplava i nada se da će svoj hobi uspjeti pretvoriti u pravi biznis.

"Želim da se "proguram" na tržište i postanem prepoznatljiva u svom poslu. Želim da, kad ljudi vide moju kreaciju, znaju da sam ja to napravila" kaže Dragica.

Obuka o poduzetništvu dio je ekonomskog osnaživanja porodica pogođenih poplavama i klizištima 2014. godine koje provodi Program .



NAKON POPLAVA: PODUZETNIŠTVO KAO VAŽAN KORAK U OPORAVKU

Više od 200 porodica čija su domaćinstva pogođena katastrofalnim poplavama i klizištima 2014. godine dobilo je priliku za bolju ekonomsku budućnost kroz projekat koji finansira Evropska unija, a provode UNDP i partnerske organizacije.

Tog ponedjeljka, 32-godišnja Edina je napustila svoj dom u Zavidovićima u pet sati ujutro te se zaputila u 68 kilometara udaljeni Vitez. Ni četiri sata vožnje ni osam autobusa koji su bili potrebni da stigne na odredište, nisu je spriječili da učestvuje na obuci o poduzetništvu koju provodi Program za oporavak od poplava – stambeno zbrinjavanje.

„Bilo je malo naporno putovati“ priznaje Edina. „Ali kad se ujutro probudim i pomislim da taj dan ne odem na trening, sjetim se da će svi ostali nešto naučiti, a ja to neću znati.“ Edina je nezaposlena majka dvoje djece i završila je frizerski zanat u kojem vidi svoju budućnost. „Voljela bih da se počnem time baviti profesionalno.“

Obuka o poduzetništvu samo je jedan dio opsežnih aktivnosti koje provodi

Program s ciljem ekonomskog osnaživanja ugroženih porodica iz područja pogođenih poplavama i klizištima 2014. godine. Kroz ovu obuku, odabrani korisnici Programa će u narednom periodu steći vještine potrebne za razvijanje i vođenje vlastitih malih biznisa, što bi njima i njihovim porodicama trebalo pomoći u osiguranju bolje budućnosti i oporavku čitave zajednice.

Pored podrške u oblasti samozapošljavanja i pokretanja malog biznisa, kroz Program, koji finansira Evropska unija, a implementira UNDP u saradnji s partnerskim organizacijama, korisnicima će biti pružena pomoć u oblasti poljoprivredne proizvodnje i zapošljavanja. Kao rezultat, ukupno 221 domaćinstvo iz 35 općina i gradova u BiH će učestvovati u ekonomskom osnaživanju koje prati i stambeno zbrinjavanje oko 2.800 osoba čiji su domovi uništeni ili oštećeni u poplavama i klizištima 2014. godine.

Jedna od učesnica obuke o poduzetništvu

je i Senija iz Doboja koja, zajedno sa svojom užom porodicom, proizvodi jagodičasto voće. Na pitanje šta je naučila tokom obuke, Senija odgovara da se bojala da će se trener više fokusirati na teme koje ona neće razumjeti. „Ja se ipak bavim samo poljoprivredom“ kaže ona i dodaje: „Međutim, treninzi su bili jako dobri i jako pristupačni i nama koji nismo završili fakultete. Puno toga su mi razjasnili, o načinu poslovanja, otvaranja firme, pomogli su da sagledamo sve aspekte posla i na kakve prepreke možemo da naiđemo.“

Po završetku obuke bit će upriličena prezentacija poslovnih ideja i biznis planova, na osnovu kojih će polaznici obuke pristupiti registraciji malih biznisa. Korisnicima će biti nabavljena potrebna oprema i alati za realizaciju njihovih poslovnih ideja, a u prvoj godini poslovanja bit će osigurano mentorstvo i savjetodavne usluge za sve novoosnovane male biznise.

Za budućnost, polaznici obuke za poduzetništvo imaju jednostavne želje. „Voljela bih da mogu da zaradim za neku skromnu platu, da imam da platim svoje troškove“ kaže Edina.

Senija sanja da ima svoj brend. „Voljela bih da svoj proizvod preradim i da taj svoj sok mogu prodati, te da zaradim penziju.“

Uz pomoć Programa za oporavak od poplava, Edinin i Senijin put ka malom poduzetništvu i boljoj budućnosti bit će uveliko olakšan.



SANIRANI DOMOVI ZA VIŠE OD 240 PORODICA

U proteklom periodu, uz finansijsku podršku Evropske unije, UNDP i njegovi partneri Međunarodna organizacija za migracije (IOM), Arbeiter-Samariter Bund (ASB) i Hilfswerk International (HWI) su sanirali 240 stambenih jedinica poboljšavajući uslove života za njihove stanare.



**IZGRAĐENO 60 NOVIH STAMBENIH
JEDINICA U OPĆINAMA I GRADOVIMA
BIJELJINA, BROD, DOBOJ,
DOMALJEVAC-ŠAMAC, LOPARE, MAGLAJ,
MODRIČA, ŠAMAC I TRAVNIK.**



O PROGRAMU ZA OPORAVAK OD POPLAVA - STAMBENO ZBRINJAVANJE

Katastrofalne poplave, najteže u posljednjih 120 godina, zadesile su Bosnu i Hercegovinu u maju 2014. godine. Poplave su obuhvatile četvrtinu teritorija države i pogodile oko million osoba.

Kako bi se ublažile posljedice ove prirodne nepogode, osmišljen je Program za oporavak od poplava - Stambeno zbrinjavanje. Ovaj Program ima za cilj da stambeno zbrine **skoro 3,000 osoba** čiji domovi su oštećeni ili uništeni u poplavama 2014. godine, **te ekonomski osnaži najugroženije porodice.**

Vrijednost Programa je 15 miliona eura, a finansira ga Evropska unija, u iznosu od 12,5 miliona eura u saradnji sa Vladom Federacije Bosne i Hercegovine, Vladom Republike Srpske, UNDP-om i lokalnim vlastima. Program implementira UNDP u BiH zajedno sa Međunarodnom organizacijom za migracije (IOM), Arbeiter-Samariter-Bund (ASB), Hilfswerk International (HWI) i partnerskim općinama i gradovima.

Program se implementira u 44 općine/grada: Banja Luka, Bijeljina, Bratunac, Brod, Cazin, Doboј, Doboј Istok, Domaljevac-Šamac, Donji Žabar, Goražde, Gračanica, Gradiška, Jezero, Kakanj, Kalesija, Kostajnica, Laktaši, Lopare, Maglaj, Modriča, Novi Grad, Odžak, Orašje, Petrovo, Prijedor, Prnjavor, Sapna, Srbac, Srebrenik, Šamac, Šekovići, Šipovo, Teslić, Tešanj, Travnik, Tuzla, Ugljevik, Vareš, Vlasenica, Vogošća, Zavidovići, Zenica, Zvornik i Žepče.



PROGRAM ZA OPORAVAK OD POPLAVA - STAMBENO ZBRINJAVANJE



Program za oporavak od poplava predstavlja nastavak napora Evropske unije na ublažavanju posljedica katastrofalnih poplava koje su pogodile Bosnu i Hercegovinu 2014. godine. Prva faza Programa, provedena od augusta 2014. do februara 2016. godine, postigla je impresivne rezultate **poboljšavajući uslove života za 610.000** stanovnika diljem Bosne i Hercegovine.

Ovaj Program podržava sljedeće Ciljeve održivog razvoja:



Copyright: UNDP BiH, 2018; Fotografije: Aida Šunje, Jim Marshall, www.ba.undp.org

Februar, 2019. godine

Ova publikacija je nastala uz podršku Evropske unije. Sadržaj ove publikacije je isključiva odgovornost Programa za oporavak od poplava - stambeno zbrinjavanje i ne predstavlja nužno stavove Evropske unije.